




Literatura den Bon Dia

Ernesto E. Rosenstand



TUR COS A KEDA ATRAS

- Y djei?
- Con y djei?
- Manera bo ta tende.
- Ami por duna bo loke bo kier.
- Mi no mester nada di bo.
- Lo mi haci loke bo bisa.
- No tin mester.
- Ami ta stima bo.

Ora Carmen a tende tur esaki ela keda keto y sigui su caminda y ora Juan a ripara esaki el a stop di insisti y a bai su auto bek. Y for di e dia ei e no a tende mas di dje. .

18

Noviazgo entre Carmen cu Jacinto no a dura mucho. Hopi biaha noviazgo hopi largo no ta cumbini. Nan a dicidi di casa pasobra nan a pensa cu noviazgo mucho largo lo no bai tin sentido. Y no tabatin ningun motibo pa spera. Nan tabata stima otro. Nan tabata decidido pa casa, anto pakico warda mas.

Carmen kier a bai biba independiente y mira si nan por yega na famia. Ya algun di su amiganan a logra esaki. Y e no kier a keda atras. P'esei e tabatin pura, el a pensa cu pa nan lo ta miho nan casa.

Di e manera ei lo e libra di Juan. Asina lo e bai ta sigur cu Juan lo no sigui molestie.

E tabatin miedo cu un dia Jacinto lo haya sa. Cu tur e consecueneciann cu esei por trece cu ne. Y ya e tabata conoce Jacinto bon y el a hay'e un bon mucha homber. Un cu lo e por pasa resto di su bida cu ne.

Su mayornan poco poco tambe a bin acept'e. Principalmente Calixto tabata loco cu ne. Y despues di a pensa basta nan a compronde cu miho cos cu nan haci ta casa.

Su mayornan tambe tabata di e mesun opinion. Y berdad nan a casa. No cu mucho pompa. Nan no a haci fiesta grandi ma fiesta si nan a haci. Ken no ta fiesta na un ocasion asina?

Amigonan a yud'e lo mas tanto cu nan tabata por y nan a organisa algo no mucho luhoso. Ma e tabata hopi anima si.

Dia di casamento Carmen tabata tur afo. Hopi contento y felis. Por fin el a haya su felicidad Un felicidad cu e tabata desea asina tanto. Den su bisti di bruid e tabata hopi bunita mes. Y unda cu el a pasa e dia ei entre su amigo y amiganan ta hari y gosa so e tabata gosa. E tabata pensa cu por fin el a haya loke e tabata desea.

E tabata felis. Unico cos cu a dañu un poco su felicidad tabata na final di e fiesta nan a trece p'e un buket cu solamente riba dje e palabranan: Di un amigo!

E tabata uno mescos cu esun dia di entiero di su wela.

El a reacciona masha sorpendi. Pa un momento el a paraliza. Y esei a haci cu Jacinto a puntr'e, di ken e ta, ma el a bis'e cu e no tabata sa. Y cu e no tabatin e minimo idea di ken por a manda nan esaki. El a kere cu ta un amigo di Jacinto a mand'e.

Ma en realidad e tabata sa masha bon ken a mand'e. E no por a compronde di con Juan no por a lague cu sosiego. Cueste loke cueste e kier a dañu e anochi aki. E anochi di mas bunita di su bida.

Depues di poco rato el a lubida e incidente aki. E fiesta a pasa asina bon cu e no tabatin nada di keha. A bai manera el a spera. Su amigo y amiganan a cumpli cu ne. Nan a percura pa e anochi aki tabata uno inolvidabel. No tabata tin ningun sorto di desorden.

E unico punto negativo tabata e buket di Juan. Prome e tabatin miedo cu e ex-amigonan di su tata lo bin y di e manera aki dañu e fiesta. Nan a comporta nan. Berdad, cu algun di nan a para p'afo ma nan no a haci fastioso. De bes en cuando nan tabata haya nan bitter y esei a haci cu ni hiek nan a hiek.

19

Ainda despues cu nan a casa hopi hende tabata haya Carmen y Jacinto un pareha masha straño. Nan no tabatin mucho contacto cu e bisiñanan. Nan tabata prefera di keda cas y no busca contacto cu e bisiñanan.

Miho asina cu cera cu nan. Mayoria di e barrio tabata hendenan mas bieu cu nan. Nan a prefera di keda en contacto cu e amigonan cu nan tabatin prome cu nan a casa.

No cu esakinan a haci nan nada. Ma nan a prefera evita e contacto. Ma esaki no tabata porta, pasobra nan tabata felis. Nan por a hiba un bida trankil y keto. Nan no mester a worry cu ningun hende. Y bon mira esaki tambe tabatin su bentahanan.

Di e manera aki nan tabatin mas tempo pa nan. Loke tabata hopi bon, ya cu nan tabata pas casa.

Ainda tabatin hende cu no por a compronde con Carmen por a casa cu Jacinto un yoncuman cu di baina bo tabata tende papia. Anto Carmen cu tabata yen di bida. Yen di energia.

E tambe a bin ripara esei. E tabata haya cu Jacinto tabata mas serio di loke el a kere. Jacinto tabata hopi keto. Esei tabata tur. Hopi biaha prome cu nan a casa Carmen tabata pensa riba e asunto aki tambe.

Ma e no tabata haya esaki nada malo. Na su manera di actua e no por a trece ningun cambio. P'esei semper e tabata yega na e mes un conclusion: e tabata stima Jacinto. Y Jacinto tambe tabata stim'e. Esei tabata conta.

Papiamento di e otronan no tabata haci impresion riba nan. Y dor di esaki mes nan tabata keda leu di nan. No tabatin sentido join nan. Nan tabata di opinion cu manera nan tabata biba tabata bon. Ki mas desea?

Jacinto tabata keto, ma tur cos tabata muestra cu lo e bai ta un bon homber p'e. E tabata un homber di su cas, nada di paranda. Pues algo hopi positivo. E no tabata gusta sali mucho. Fo'i su trabou e tabata bin su cas.